

欽定天文正義卷五十九

雪占 霰占附



雪占 霰占附

詩小雅信南山篇上天同雲雨雪雰雰益之以霰  
霰既優既渥既霑既足生我百穀註同雲雲一色  
也將雪之候如此霏霏雪貌霰霰小雨貌優渥霑  
足皆饒洽之意也冬有積雪春而益之以小雨潤  
澤則饒洽矣

大戴禮天地積陰溫則為雨寒則為雪蓋因空中  
風結而成雨為氣之和雪為陰之盛盈尺順時益  
於萬物則為瑞及丈逆令損於萬物則為災草木



之花皆五出雪花六出朱子謂地六生水之義陰之成數也立春後雪則五出冬屬陰春屬陽陽奇陰耦天地自然之氣也

開元占元命包曰陰陽凝為雪汜勝書曰雪者五穀之精魯子曰陰氣勝則凝為雪董仲舒曰太平之世雪不封條陵殍毒害而已天鏡曰秋雨雪百姓多死草木零落天下大喪雪下厚三尺以上大兵方起

觀象玩占雪本雨也寒甚而空中風結之以成雪

或過多或非時則為災冬雪盈尺來年大豐八節占曰冬有積雪歲美人和穆天子傳冬雪盈尺年豐之候春雪不消天鏡占曰天下飢己巳占正月雪三日內消或至地即化者歲成人安七日不消大臣下獄秋穀不成亦為臣有不奉主命者二月雪七日不消百果不實臣專政大臣死牛馬傷夏秋民不安三月雪經日不消秋禾不成米貴三倍大臣憂夏雨雪有喪大兵起秋雨雪有喪民多死兵起大飢冬三月無雪來年麥惡五穀不成蟲生



人疫凡非時雨雪皆為刑罰慘酷姦邪得志兵革將興之徵

田家五行下雪而不消名曰等伴主再有雪久經日照而不消亦是來年多水之兆也

霰占

詩小雅頍弁篇如彼雨雪先集維霰註霰雪之始凝者也將大雨雪必先微溫雪自上下遇溫氣而博謂之霰久而寒勝則大雪矣

爾雅雨霓為霄雪邢昺疏霓水雪雜下也因名霄

雪霄即消也

開元占說文曰霰稷雪也從雨散聲釋名曰霰星也水雪相搏如星而霰曾子曰陰之專氣為霰